

中國方志叢書·華中地方·第四三一號


據

清·錢熙泰修
清咸豐八年鈔本

影印

江蘇省

金山縣志



成文出版社有限公司印行



10098040

中華民國七十二年三月臺一版

金山縣志

共一冊

發行人：黃 成 助

台北郵政信箱二二六〇五號
出版者：成文出版社有限公司

台北郵政信箱二二六〇五號

台北市杭州南路一段6巷9號3F

電話：三九一六四一六（五線）

印刷者：上林彩色印刷有限公司

台北市大理街145號

新聞局出版登記證：局版台業字第243號

縣志論

夫志乘之濫觴實源於史古者地里有圖有志周官職方氏與小史外史所掌下及郡國皆有志非徒備一代掌故已也晉志疆域次建置重境土也任土作貢賦役次之帑藏足矣莫先於利民生故次食貨體統正矣猶貴敦教化故次學校有文教不可無武備故次海防二守固必徵以文獻故次藝文且察宦則績知政事之得失傳人物則知人材之盛衰興風土之美惡述往事勸來者其於政乎繫焉若此其大也金邑僻處海壖以百

數十年未續云志一旦考其因革興廢而欲說古証今以傳後必將創新例易舊目以求合於史體竊嘗聞之久矣夫修志之要有四一曰專任一曰採訪一曰聚書一曰無私間攷史記漢書及五代史皆成於一人之手取其筆法前後如一也世士夫專攻帖括鮮有明史家之體例者夫修之者非第在於博學必先以才與識三者兼之而猶貴優於行益志局一開即有束脩紙札之費紛紛求入局者各懷意見互相攻駁惟利是圖如承祚之修魏志索米以立佳傳自古為然近如華亭縣之

王志南滙縣之吳志上海縣之李志其才豈非不重於當時而兩志則前後矛盾兩傳則敘述異同甚非帖括之語即竄入駢儷之詞終無有盡善盡美之歎者大抵坐開局之病不立一專任者之故也然此貴乎專任者不必設局而責之以總修深得二三人以左右是役或長考掇或舉紀載或明載故將前志之畧者增之冗者節之若者叙次未明若者法文不古又從而糾正之究辦之期無乖於史法而後止衆長既集則又恐其漏畧又必採訪以分佐之藉非邑人又恐見聞不確更須得

一明於地理者親履其地凡山川之脉絡如某山自某山分支距某處若干里某水之源出於某處而取入之水滙於某處一一圖其形勢況此通彼塞今昔不同故按舊志以增益之仿水經注叙事之法以及坊表橋梁寺觀至人物節孝之類仿查明確兼之考核載籍則聚書猶為要務以史遷作史記鄭樵尚譏所見之書少況金邑自分縣以前如地理之沿革非考諸二十四史及三通寰宇記吳郡志諸書不能明也有時事之有關一邑利病或漏於紀載者一時之見聞有限不參証近人

諸集其事非尚不足以徵信也節目未能明備去取未能精詳如璜溪志朱里志衛城志等皆足以羽翼志乘以備蒐羅必須蒐佚點訛不以撝拾繁富爭長較之因襲不增修以志修志者相去遠矣然所纂輯猶貴無私宋儒有言修志之難同於作史直筆公心兼長斯善劉知幾作史通以亢直不畏疆禦為第一義一存私見必至濫收凡為子若孫者誰不欲傳其祖父載其詩文不傳則已傳則其政皆龔黃也其德皆顏曾也其才皆班馬也空言益美莫辨等差前志及宋府志皆蹈此弊然

狗情則乖史法而東公則招衆忌竊謂前志所以傳者
不敢妄刪未傳者不宜濫錄其廢廢而無提者則必挾實
之畧而不詳者則必廣搜之湮而未彰者則必幽闡之
如功無以利民生德不足孚衆望言不能傳著述猶宜
慎之慎昔人云不為利藪不為怨府誠非虛語也蓋去
取嚴之可為信史耳其此四者而後仿史家之義例以
正名目史記有年表有紀有帝紀有年表有書有世家有列傳未嘗統名
之曰記漢書有帝紀有年表有本志有列傳亦未統名
之曰書今之修志者徃徃皆強繫志字以成書如秩官

選舉表體也而名之曰志人物列女傳體也而亦目之
曰志或以一志統數志或一志而強立名目皆不合史
體惟將前志所當因與不當因者增損於其間則新志
之凡例統歸劃一焉按前志為焦太史。所輯不免
遺逸庸陋之病此次修志非敢掎摭前人以自自是也
詩曰維桑與梓必恭敬止若知其闕失而不爭正者非
所以重前哲也按舊志卷首不列宸翰本邑為

聖駕南巡所不及所有頒賜諸臣聯語此係私幸無庸
恭紀最合體裁諸圖亦分繪明。惟沿革統於建置星

野勒襲空文秋祀與寺觀分門職官與裁員混列坊表
所遺不少墳墓多有濫收金石不立專門物產同於各
志海防鹽法為本邑第一要務則缺焉不詳藝文濫入
詩文似乘志体例貢例監吏員鄉飲賓等類固不勝收
致多遺佚況縣志非家乘可比是書廕猶為贅入兼之
所載名宦上溯唐宋備紀總督撫臣政績似與分縣無
涉人物與科目兩岐且多濫入其傳敷衍空詞猶宜重
加裁汰總之金為分邑一切紀載總覈其實係其地者
書之舊志不免牽連華婁兩邑之病其類舊分三十姚

氏續修志稿亦因之惟於科目列女兩門最為詳覈其採訪列女以道光十五年為止科目則多借才隣邑是宜刪者人物者不分儒林文苑諸門頗合史體而所收大半強援華婁原籍並追采土著之祖父及子孫之遷徙者各傳叙體則失之太簡二則不能達其可傳之實餘如蓋法田賦坊表橋梁第宅等類悉因舊志並未采訪一二惟藝文則仿漢書專載本邑人著述書目而冠以

欽

頒書籍為不倫耳末仿蕭大可蕭山縣志例為三次刊誤

數則考核精詳是可法也茲就前志及姚氏志稿審定
其去所並參以武功靈壽朝邑諸志之合於史例者為
表四志八列傳十二庶幾不悖於古實於志體未窺涯
淡知不免以鐫笑楚也

咸豐八年 月金山錢熙泰識

修志凡例

一志仿史體法貴謹嚴舊志分類三十姚氏訥續修志稿

亦以之今擬仿武功縣志例為表四沿革疆域志八地理建置

賦役藝文列傳十二名宦政績儒林文苑忠節孝友期於文約

事增則後人易資省覽也

一舊志纂於分縣之後一切記載不免牽入華婁西邑

擬詳加考覈實係其地者書之以雍正三年為始

一卷首前列全境諸國餘圖分列各門下以表左圖右

史之意

一沿革疆域及職官選舉皆仿史例作表疆域首列鄉保區圖末附鎮市各地名職官表內如橫浦兩場益大使另附於鹽法志後其額設舊制各負姚志皆刪今存之另作題名記附後使來者有所稽考焉

一邑境瀕海明設七所重兵遂為重地然明制兵防海岸而國朝之兵防於舟山狼山等處是以舊志兵防傷於略今按時與地自應首務及此故立海防志以統之

一邑設鹽場而鹺政又今昔互異灶丁占蕩稅場徵舊

志最為疎漏茲遵兩浙鹽法志及橫浦浦東兩場冊檔
互相考証詳載以補之

一各畝河道為一邑水利所關必須脉絡分明而後有
疏治之法舊志所載此塞彼通今昔互異茲就各處
訪查每保各繪一畝外以方線限之以規里數並依水
經注標幹水為綱詳列支水附於下俾源委可尋後之
治水利者考其興廢因勢而利導之思過半矣

一橋梁各標明所跨諸河段落墳墓寺觀僅載其表
著者風俗物產則詳本邑所獨至昔存今廢之倉署

第宅橋梁坊表等項皆存其目附後有基址可訪者悉註明其下

一舊志科目下列例貢吏負創監恩賚四門茲以不及脩載刪之惟旌義各人名擬作合傳附雜志內又鄉飲賓各題名擬附鄉飲酒後

一舊志列傳濫收頗有抵牾悉為辨正仿史記陳平聶政諸傳註明某村某鎮人並仿列錄下注原引及參用書目以杜濫入不敢憑耳食也唯列女一門以節烈為主其貞孝賢淑才女亦間為採入不復分

類均以年之先後為次有年例已符而未邀憲旌
者亦採入而現存者不與焉

一舊志藝文二卷濫入詩文似乖志體茲仿漢書例
祇載書目並以詩文之有關一邑掌故利病者散
綴於各門下自唐至元均採無遺自明至國朝選
入尤嚴至書目下仿提要體例以著其尤者餘存
其目以別之而金石尤資考証舊志不載今仿隸
釋隸續例間錄原文及大小尺寸並附載焉

一舊志兵燹祥異風俗三門與府志大畧相同茲